

## Al 1 di novembar DUCJ I SANTS

La Glesie e je e e sarà simpri sante: Crist i à volût ben come a la sô nuvice e si è dât vie par jê, par fâle sante; par chel ducj inte Glesie a son clamâts a la santitât (cf. Conc. Vat. II, Costituzion dogmatiche su la Glesie, «Lumen gentium», 39). La Glesie e predicje il misteri pascâl intai sants ch'a àn patît cun Crist e cun lui a son glorificâts, e propon ai fedêi i lôr esemplis ch'a tirin ducj al Pari midiant di Crist e e implore pai lôr merits i benefizis di Diu (cf. Conc. Vat. II., Costituzion su la sacre Liturgjie, «Sacrosanctum Concilium», 104). Vuê intune uniche fieste si celebrin, dutune cui sants canonizâts, ducj i jusecj di ogni lenghe, di ogni gjernazie e di ogni nazion, che i lôr nons a son segnâts intal libri de vite (cf. Ap 20,12). Si scomençà a celebrâ la fieste di ducj i sants, ancje a Rome, fin dal sec. IX.

### Antifone di jentrade

Gjoldin ducj intal Signôr, celebrant la zornade di fieste in onôr di ducj i Sants:  
de lôr solenitât a gjoldin i Agnui e a laudin il Fi di Diu.

Si dñs Glorie a Diu.

### Colete

Diu onipotent e eterni,  
che tu nus dâs di podê celebrâ intune sole volte  
i merits di ducj i tiei Sants,  
pai tancj che a prein par nô,  
danus cun bondance la tô misericordie tant suspirade.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Ap 7,2-4.9-14

O viodei un stragjo di int, tante che nissun nol rivave a contâle, di ogni gjernazie e tribù e popul e lenghe.

Dal libri de Apocalìs di san Zuan apuestul

Jo, Zuan, o viodei un agnul che al leve sù de jevade e al veve il sigjîl dal Diu vîf. E ur berlave a grande vôs ai cuatri agnui che ur jere stât dât il podê di fiscâ la tiere e il mâr: «No stait a fiscâ ni la tiere ni il mâr ni lis plantis fintremai che no varin marcât il sigjîl dal nestri Diu sul cerneli dai siei servidôrs». Po dopo o sintii il numar di chei che a jerin stâts marcâts cul sigjîl: cent e cuarantecuari mil, marcâts di ogni tribù dai fîs di Israel.

Po dopo al comparì un stragjo di int, tante che nissun nol rivave a contâle, di ogni gjernazie e tribù e popul e lenghe. A stavin ducj in pîts denant de sente e denant dal Agnel, vistûts a blanc e cu lis palmis tes mans. E a berlavin a grande vôs:

«La salvece e je dal nestri Diu sentât su la sente e dal Agnel!».

Alore ducj i agnui che a jerin di ca e di là de sente e i viei e i cuatri nemâi si butarin in zenoglon cu la muse par tiere denant de sente e a laudarin Diu disint:

«Amen! Laut, glorie, sapience, agrât, onôr, potence e fuarce al nestri Diu tai secui dai secui.

Amen».

Alore un dai viei si voltà viers di me e mi disè: «Chei vistûts a blanc cui sono e dontri vegnino?». I rispuindei: «Paron, tu lu sâs tu». E lui: «A son chei che a son passâts pe grande tribulazion e a àn lavâts e fats diventâ cjandits i lôr vistûts cul sanc dal Agnel».

Peraule di Diu.

### SALM RESPONSORIÂL dal Salm 23

R. Furtunâts i monts di cûr, parcè che a viodaran Diu.

Dal Signôr e je la tiere cun dut ce che al è dentri,

il mont cun dut ce che al baline,  
parcè che su lis aghis lui le à fondade  
e su lis corints des aghis le à saldade. **R.**

Cui puedial lâ sù su la mont dal Signôr?  
Cui puedial restâ te sô cjase sante?  
Chel che al à cûr mont e mans inocentis,  
che no si piert daûr di ce che nol à tignince  
e che par ingjanâ nol zure. **R.**

Chest al varà la benedizion dal Signôr  
e justizie dal Diu che lu salve.  
Cheste e je la gjernazie di chei che lu cirin,  
che dal Diu di Jacop a bramin la muse. **R.**

### **SECONDE LETURE 1 Zn 3,1-3**

**O viodarìn Diu come che al è.**

De prime letare di san Zuan apuestul  
Miei cjârs, viodêt ce sorte di amôr che nus à dât il Pari: di jessi clamâts fîs di Diu, e lu sin pardabon!  
Se il mont no nus cognòs al è parcè che nol à cognossût lui. Miei cjârs, nô o sin za di cumò fîs di  
Diu, ma no si è ancjemò pandût ce che o sarìn. O savìn però che cuant che lui si sarà pandût, nô o  
sarìn sul so stamp, parcè che lu viodarìn come che al è.  
Chel che al à cheste sperance in lui, al cîr di smondeâsi come che al è mont lui.  
Peraule di Diu.

### **CJANT AL VANZELI Mt 11,28**

**R. Aleluia, aleluia.**

Vignît di me, ducj vualtris che o sês stracs e masse cjamâts,  
e jo us fararai polsâ, al dîs il Signôr.

**R. Aleluia.**

### **VANZELI 5,1-12**

**Stait contents e gjoldêt, parcè che grande e je la vuestre ricompense tai cîi.**

Dal vanzeli seont Matieu

In chê volte, viodint lis folis, Jesù al lè su la mont e, a pene sentât, i lerin dongje i siei dissepui.

Alore al vierzè la bocje par inscuelâju disint:

«Furtunâts i puars tal spirt,

parcè che il ream dai cîi al è lôr.

Furtunâts chei che a vain,

parcè che a saran consolâts.

Furtunâts chei che a son bogns di cûr,

parcè che a ereditaran la tiere.

Furtunâts chei che a àn fan e sêt de justizie,

parcè che a saran saciâts.

Furtunâts chei che a àn misericordie,

parcè che a cjataran misericordie.

Furtunâts i monts di cûr,

parcè che a viodaran Diu.

Furtunâts chei che a lavorin pe pâs,

parcè che ur disaran fîs di Diu.

Furtunâts chei che a son perseguitâts par colpe de justizie,

parcè che il ream dai cîi al è lôr.

Furtunâts vualtris cuant che us svilanaran e us perseguitaran e, cu la falsetât, a disaran cuintri di vualtris ogni sorte di mâl par colpe mê. Stait contents e gjoldêt, parcè che grande e je la vuestre ricompense tai cîi».

Peraule dal Signôr.

**Si dîs** O crôt.

### **Su lis ufiertis**

Ve agrât, Signôr, i regâi  
che ti presentin in onôr di ducj i Sants  
e danus di sintî che i tegnin a la nestre salvece  
chei che ju crodìn za sigûrs de lôr imortalitât.  
Par Crist nestri Signôr.

### **Antifone a la comunion Mt 5, 8-10**

Furtunâts i monts di cûr, parcè che a viodaran Diu.  
Furtunâts chei che a lavorin pe pâs, parcè che ur disaran fîs di Diu.  
Furtunâts chei che a son perseguitâts par colpe de justizie,  
parcè che il ream dai cîi al è lôr.

### **Daspò de comunion**

Adorant, Signôr, il sflandôr che tu palesis,  
tu l'unic Sant in ducj i tiei Sants,  
o domandìn la tô gracie  
par che, colmant la nestre santificazion cu la plenece dal to boncûr,  
o podìn passâ di cheste taule di pelegriins  
al gustâ de patrie dal cîl.  
Par Crist nestri Signôr.